



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Atividade Mensál

Observasaun ba Parlamentu Nasionál

Marsu 2021

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
info@jsmp.tl
Facebook: www.facebook.com/timorleste.jsmp
Twitter: @JSMPtl

Tabela Konteúdu

Tabela Konteúdu	2
Introdusaun	3
A. Reuniaun Plenária	3
1) 01 Marsu 2021.....	3
2) 02 Marsu 2021.....	4
3) 09 Marsu 2021.....	4
4) 16 Marsu 2021.....	5
5) 22 Marsu 2021.....	6
6) 29 Marsu 2021.....	6
<i>Intervensaun deputadu sira nian</i>	7
<i>Intervensaun husi Governu</i>	8
Reuniaun Komisaun A	9
1) 04 Marsu 2021	9
2) 17 Marsu 2021	11
3) 18 Marsu 2021	11
4) 24 Marsu 2021	11
5) 25 Marsu 2021	12
6) 30 Marsu 2021	13
Konkluzaan no rekomendasaun	14

Introdusaun

Iha Marsu 2021, maski iha situasaun serka sanitária no konfinamentu obrigatóriu maibé JSMP kontinua halo monitorizasaun ba atividade reuniaun sira iha plenária Parlamentu Nasionál no reuniaun ka audénsia sira Komisaun A ne'ebé hala'o iha Parlamentu Nasionál.

Atividade Parlamentu Nasionál kontinua la'o normál no agenda sira ba reuniaun sira plenária kontinua deside liuhusi reuniaun líder bankada sira atu realiza reuniaun plenária iha kada semana ida dala ida.

Enkuantu atividade sira Komisaun nian hala'o ho normál iha Kuarta no Kinta-feira tuir oráriu serbisu Komisaun nian ne'ebé regula ona iha Rejimentu Parlamentu Nasionál.

Totál reuniaun plenária sira iha Marsu 2021 hamutuk dala 8 (ualu) no reuniaun sira Komisaun A nian hamutuk dala 6 (neen).

Tuir mai ne'e JSMP sei halo deskrisaun detaladu kona-ba rezultadu sira reuniaun plenária no Komisaun A, Parlamentu Nasionál nian iha Marsu 2021, mak hanesan tuir mai ne'e :

A. Reuniaun Plenária

1) 01 Marsu 2021

Parlamentu Nasionál liuhusi sesaun plenária ordinária iha 01 Marsu 2021, autoriza pedidu Prezidente Repúblika kona-ba estensaun ba Estadu Emerjénsia (EE) ba dala 11. Estensaun ba EE ba dala 11 ne'e hahú husi loron 04 Marsu to'o 02 Abril 2021.

Razaun estensun ba EE ba dala 11 ne'e tanba haree ba kazu infesaun Covid-12 iha nasaun viziñu sira liuliu iha Indonézia kontinua aumenta maka'as no iha Timor-Leste rasik kazu transmisaun lokál hahú ona iha Munisípiu Covalima.

Tanba ne'e importante tebes ba Governu atu kontinua implememnta EE nune'e bele kontinua kontrola no prevene di'ak liután transmisaun lokál. Enkuantu medida sira sei kontinua mantein ho EE anteriór no sei kontinua halo kontrolu ne'ebé rigorozu ba fronteira sira, liuliu fronteira terrestre.

Iha intervensaun, deputadu sira husu ba Governu atu kontinua halo kontrolu másimu ba fronteira sira, nune'e bele prevene movimentu ilegál sira ne'ebé tama sai fronteira tanba de'it sira-nia passaporte ka KITAS ba estudante sira ne'ebé liu prazu ona tanba tauk selu multa.

Kestaun seluk mak husu ba comunidade sira ne'ebé tama sai Munisípiu Covalima obligatoriamente tama iha kuarentina loron 14.

Alende ne'e, deputadu sira husu ba Ministériu Saúde atu kontinua halo sosializasaun ba comunidade sira no halo prevensaun ne'ebé máximu ba iha territoriu tomak.

2) 02 Marsu 2021

Iha sesaun plenária 2 Marsu 2021, Parlamentu Nasionál halo apresiasaun ba relatóriu fiskalizaun Komisaun G ne'ebé trata asuntu edukasaun, juventude, kultura no sidadania iha Munisípiu Lautein no Vikeke.

Iha vizita fiskalizaun ba Munisípiu Lautem, Komisaun G deskobre problema sira hanesan infraestrutura, kondisaun infraestrutura, eskola EBF Usufasu-Luro nia kondisaun aat hotu ona, eskola sira iha área rurál balun seidak asesu ba eletrisidade, sala ba hanorin nian ne'ebé la suficiente no seluktan.

Rekursu umanu ba kargu xefia sira balun seidak simu subsidiu, rezidénsia ba profesór sira laiha no formasaun ba profesór sira laiha. Implementasaun kuríkulu seidak kompletu tanba ne'e husu atu hadi'a jestaun.

Husi deskobrimentu sira ne'e deputadu hato'o rekomendasaun ba Governu atu tau atensaun ba kondisaun infraestrutura eskola sira, rekursu umanu no mós prosesu aprendizajen no kontinua implementa programa formasaun ba profesór sira.

Iha sesaun ne'e mós Parlamentu Nasionál halo aprovasaun ba Projetu Lei Nú.28/V(1ª) kona-ba debate ho sidadaun.

Projetu lei ne'e ho objetivu atu promove edukasaun sívika no estimula partisipasaun política husi sidadaun sira, promove debate demokrátiku no respeita ba diversidade opiniaun.

Aprovasun ba projetu lei ne'e ho votu afavór 51, kontra 0 no abstensaun 3.

3) 09 Marsu 2021

Iha sesaun plenária 09 Marsu, Parlamentu Nasionál halo apresiasaun ba relatóriu fiskalizaun Komisaun E ne'ebé mak halo iha Munisípiu RAEOA, Lautein no Vikeke.

Husi relatóriu fiskalizaun ne'e ko'alia kona-ba projetu sira, kona-ba rehabilitasaun estrada, eletrisidade, bee moos no saneamentu iha munisípiu sira refere.

Aleinde ne'e, iha mós deklarasaun política husi bankada KHUNTO relasiona ho deklarasaun husi bankada CNRT nian ne'ebé insulta ba Vise-Ministru interiór katak halo abuzu poder relasiona ho kazu haksasuk malu entre Sr. Naimori ho Sr. Arnaldo Mendes iha rezidénsia sira nian no deskonfia polisia halo ameasa ba Sr. Arnaldo tanba iha momentu ne'ebá hetan prezensa husi Vise-Ministru Interiór Sr. Antonio Armindo.

Iha deklarasaun ne'e, bankada KHUNTO husu ba bankada CNRT atu halo deklarasaun política ho konstruivu, uza linguajen ne'ebé apropriadu no informasaun ne'ebé loos ba públiku.

Bankada KHUNTO mós la aseita ho intervensaun deputadu sira husi bankada CNRT nia linguajen ne'ebé hasai ba konseleru superiór KHUNTO katak "kakutak feruzen".

Iha parte intervensaun ka diversu, deputada sira levanta kestaun sira kona-ba trosu estrada prepagu iha Baukau ne'ebé la tau iha relatóriu fiskalizaun Komisaun E nian, kestaun ne'e levanta husi distinta deputada Fernanda Lay, tanba projetu ne'e tau tiha ona osan.

Kestaun seluk kona-ba Konta Jerál Estadu ne'ebe iha viajen lokál ba distritu sira iha despeza barak liu tanba ministériu sira bainhira halo viajen lori funsionáriu sira batalaun ida mak ba.

Deputadu Jose Agostinho “Xomotxo” husu ba Governu atu presiza haree didi'ak desizaun sira kona-ba *lockdown* no konfinamentu obrigatóriu, tanba ida-ne'e hanesan inimigu invizível ne'ebé ita la haree tanba ne'e sujere ba Governu atu *lockdown* ne'e aplika Timor laran tomak.

Reforsa mós husi deputadu Marcos katak tuir loloos *lockdown* ne'e Parlamentu Nasionál mak tenke hatudu uluk ezemplu ba comunidade sira, maibé iha realidade atividade hotu la'os nafatin. Tanba ne'e husu ba Meza Parlamentu, se la iha ajenda *ordem do dia*, di'ak liu ita kumpri lai regra konfinamentu obrigatóriu.

Tuir observaun JSMP nian, iha sesaun plenária ne'e Ministru ba asuntu Parlamentár no Komunikaun Sosiál la konsege hato'o informasaun ba deputadu sira tanba mosu dezentendimentu entre deputadu sira husi bankada KHUNTO, Fretilin no CNRT. Dezentendimentu ne'e mosu tanba bankada CNRT la aseita ho deklarasaun husi bankada KHUNTO ne'ebé dún bankada CNRT frustadu. Nune'e mós deputadu Jose Virjilio hakilar ba Prezidente PN katak deputadu Aniceito asaltu poder.

Iha observaun ne'e, nota katak deputadu sira-nia intervensaun la'os levanta kona-ba preokupasaun sira husi povu nian maibé levanta de'it kestaun partidária nia no insulta malu.

Ajenda ba *ordem do dia* la iha.

4) 16 Marsu 2021

Iha sesaun plenária 16 Marsu 2021, Meza Parlamentu anúnsia no baixa ba Komisaun A PJJ Nú.1/V/3 kona-ba aprova Estatutu Majistratura Judisiál no PPL Nú.29/V- segunda alterasaun ba Lei Nú.11/2009 kona-ba aprova Divizaun Administrativu Teritóriu.

Iha intervensaun diversu, deputadu sira hato'o preokupasaun kona-ba folin sasán bázika ne'ebé sa'e maka'as hanesan foos 25 kg sa'e ba \$18.00 nune'e husu ba AIFAESA atu kontrola ba asuntu sira ne'e.

Kestaun seluk ne'ebé deputau sira levanta mak oinsá Governu nia apoiu ba emprefáriu ki'ik sira ne'ebé atu lori hahan ba Munisípiu sira maibé dalan taka hotu, no oinsá ho estudante sira ne'ebé hela iha kós inklui populasauun sira iha Dili durante serka sanitária.

Responde ba preokupasaun hirak ne'e, parte Governu hateten emprefáriu sira ne'ebé atu tula hahan ba Munisípiu sira Governu la bandu, maibé importante mak tenke hetan karta autorizasaun husi Sentru Jestaun Krize. Kestaun apoiu ba popolasauun no estudante sira, sei hato'o ba Ministériu relevante hodi responde.

Iha sesaun ne'e JSMP nota katak, plenária realiza oras balun de'it, tanba kumpri ba regra serka sanitária nian, no iha parte lokraik laiha reuniaun.

Iha 15 Marsu, PN la realiza reuniaun plenária tanba serka sanitária maibé iha reuniaun líder bankada, sira diskute kona-ba funsionamentu PN iha tempu serka sanitária. Iha reuniaun ne'e PN decide plenária funsiona nafatin maibé kontinua kumpri ba regra prevensaun.

5) 22 Marsu 2021

Iha sesaun plenária ordinária, 22 Marsu 2021, Parlamentu Nasionál halo diskusaun no votasaun ba projetu rezolusuan sira no baixa ba Komisaun Espesializada Permanente projetu lei sira ne'ebé deputadu sira prepara. Alende ne'e, plenária rona mós deputadu sira-nia preukupsaun no sujestaun sira relasiona ho sira nia vizita fiskalizaun iha baze no vizita eleitoradu sira.

Iha diskusaun no votasaun primeiru ajenda mak deputadu sira diskute ba Projetu Rezolusaun Nú.68/V/3- kona-ba realizaun reuniaun plenária no Komisaun sira durante serka sanitária.

Projetu rezolusaun ne'e ho objetivu atu iha situasaun serka sanitária no konfinamentu domisiliáriu jerál ba populasaun iha Munisípiu Dili, reuniaun plenária sei funsiona semana ida dala-ida no reuniaun Komisaun Espesializada Permanente sira sei funsiona hanesan babain, la prejuizu ba realizaun reuniaun plenária iha tempu seluk ne'ebé iha konvokasaun ruma tuir termu jerál sira, maibé kumpri nafatin medida sira distansiamentu sosiál ne'ebé Governu dekreta ona no bainhira posível Parlamentu sei organiza reuniaun liuhusi video konferénsia de'it.

Rezultadu votasaun ba projetu rezolusaun refere aprovalu ho votu afavór 46, kontra 0 no abstain 13.

Parlamentu Nasionál mós halo votasaun hodi suspende deputadu Antonio da Conceição nia funsaun nu'udar deputadu no rezultadu votasaun favór 57, kontra 0, kontra 0, abstain 4 no votu branco 1.

Alende ne'e, Meza Parlamentu mós halo anúnsiu admisaun no baixa ona ba Komisaun A Projetu Lei Nú. 20/V/3 kona-ba Lei Programasaun ba Setór Justisa no Projetu Lei Nú.22/V/3 kona-ba altersaun dahuluk ba Dekretu Lei Nú.20/2017 kona-ba Estatutu ba Defensoria Pública Jerál. Maibé projetu lei ne'e Parlamentu haruka filafali ba Governu tanba Estatutu Defesoria Públiku nian kabe ba kompeténsia Governu mak dekreta.

Iha mós deklarasaun polítika husi bankada KHUNTO hodi agradese ba Governu relasiona ho medida sira hodi hatán ba situasaun epidemiolojia iha Timor-Leste, hanesan apoiu umanitária ba estudante hirak ne'ebé aluga uma iha Dili laran no mós populasaun sira ne'ebé afetadu.

Iha intervensaun diversu, deputadu sira preokupa ho kazu Covid-19 ne'ebé lorloron aumenta maka'as. Kestaun seluk mak deputadu sira kontinua preokupa ho apoiu umanitária ba estudante sira ne'ebé hela iha kost, bee moos no movimentu ba distritu sira.

Hatán ba preokupasaun sira ne'e, parte Governu informa katak apoiu ba estudante sira ne'ebé aluga uma, Governu entrega ona ba kada universidade hodi distribui ajudu sira ba estudante sira. Kestaun movimentu populasaun nian, bele asesu transporte públiku ba munisípiu maibé importante mak iha koordenasaun di'ak no hetan autorizasaun husi Sentru Jestaun Krize.

Preokupasaun sira seluk ne'ebé la konsege hatan, ministru sei enkamina ba ministériu no mós instituisaun relevante sira hodi rezolve no fó mós resposta.

6) 29 Marsu 2021

Parlamentu Nasionál liuhusi sesaun plenária ordinária, iha 29 Marsu 2021, halo diskusaun ho ajenda sira iha *período antes ordem do dia* no períodu sira *ordem do dia* nian hodi diskute no

aprova lei sira inklui rona deklarasaun polítika no informasaun diversu sira ne'ebé deputadu sira solisita durante reuniaun plenária.

Iha sesaun ne'e, deputadu sira hato'o sira nia votu felisitasaun no apresiasaun ba serbisu PNTL nian iha aniversáriu ba dala XXI. Liuhusi intervensaun deputadu sira apresia hodi kongratula ho serbisu PNTL nian ba sakrifísiu hodi aseguira orden no seguransa públiku ba povu no Estadu Timor-Leste.

Deputadu sira mós alende ne'e husu ba atu bele hadi'a kondisaun infreastuktura polísia nian inklui ekipamentu báziku nian ne'ebé sai nu'udar nesesidade hodi suporta serbisu polísia nian iha tereinu.

Rezultadu votasaun ba projetu rezolusaun ne'e aprova ho unanimidade ho votu afavór 53, kontra 0 no abstain 0 husi total deputadu sira presente na'in 53.

Hafoin ida-ne'e Parlamentu Nasionál mós aprova Projetu Rezolusaun Nú. 70/V(3)-kona-ba reafirmaaun ba ita-nia kompromísiu sira hodi kumpri akordu internasional sira relasiona ho konkordata Estadu Timor-Leste ho Santa Sé ne'ebé ratifika iha tinan 2015, ho objetivu atu fasilita misionáriu sira ne'ebé hala'o hela misaun iha Timor-Leste.

Alende ne'e, iha deklarasaun polítika husi bankada rua mak hanesan bankada CNRT no bankada KHUNTO.

Iha deklarasaun bankada CNRT nian, hato'o lamentasaun ba deklarasaun Prokuradór Jerál Repúblika (PJR) Dr. Jose da Costa Ximenes iha loron 23 Marsu 2021 hafoin hasoru malu ho Prezidente Repúblika, relasiona ho notifikasaun ba deputadu CNRT nian ne'ebé bele fó iha merkadu. Bankada CNRT hatan ba deklarasaun PJR nian katak; deklarasaun ne'e la refleta ba PJR nia koñesimentu hanesan Majistradu ida no sistematikamente hafraku tiha sistema justisa iha Timor-Leste. Bankada CNRT konsidera PJR nia deklarasaun ne'e hatudu indikasaun forte ba ódiu no vigansa pesoál hasoru Sekretariu Jerál Partidu CNRT Sr. Francisco Kalbuady Lay no Maun Boot Kayrala Xanana Gusmão.

Bankada CNRT mós konsidera PJR nia serbisu la imparsiál tanba budu tiha kazu barak ne'ebé Kámara Kontas deskobre iha iregularidade no ilegalidade, hanesan kazu ró haksolok ne'ebé halo tiha ona pagamentu 100% maibé seidak mai, inklui kazu kona-ba USB kada unidade ho folin \$450 ne'ebé akontese iha RAEOA ZEEMS.

Nune'e, Bankada CNRT husu ba Ministériu Públiku atu la bele sai fali knuuk ba atividade polítika sira partidu nian ka partidaria nian.

Iha deklarasaun bankada KHUNTO nian, levanta kestaun kona-ba situasaun no kondisaun komunidadade nian hafoin implementa serka sanitária liuliu liga ho situasaun sósiu-ekonómiku, seguransa alimentár, asesu ba saúde, nsst, hodi husu Governu nia intervensaun atu kria kondisaun ida dignu ba komunidadade sira fila-liman hodi bele sustenta sira nia família.

Intervensaun deputadu sira nian

Deputadu Virginia Ana Belo, hato'o nia intervensaun hodi sekunda ho deklarasaun bankada CNRT no KHUNTO nian relasiona ho situasaun ne'e mak oras ne'e komunidadade sira enfrenta hela bainhira Governu aplika serka sanitária no konfinamentu obrigatóriu. Nia husu mós ba ema

sira ne'ebé serbisu iha parte justisa atu la bele kria konfuzo ba públiku. Kestaun seluk ne'ebé nia foti mak relasiona implikasaun husi aplikasaun Estatu Emerjénsia (EE) no serka sanitária ba estudante sira ne'ebé hela iha Dili laran ne'ebé to'o oras ne'e Governu seidauk iha mekanizmu di'ak hodi fo apoiu ba sira.

Deputadu Antonino Bianco levanta kestaun kona-ba eskola públika no privadu sira ne'ebé seidauk iha fasilidade ne'ebé adekuaadu.

Deputadu Luis Roberto iha nia intervensaun diskorda ho deklarasaun bankada CNRT nian, tanba deklarasaun ida ne'e konsidera hamihis ona fiar ba ita-nia Prokurador Jerál, hamihis ona fiar ba sistema justisa, buat ne'ebé PJR halo bazeia ba kompeténsia ne'ebé prevee iha Kódigu Prosesu Penál iha Artigu 91 no 92.

Deputada Carmelita Moniz respode ba deputadu Luis Roberto liga ho artigu 92 KPP kona-ba notifikasaun tanba bazeia ba ida ne'e mak bankada CNRT hato'o nulidade.

Iha parte seluk, deputadu husu Governu atu re-ativa filafali loja elekrónika no konstrusaun nian hodi bele loka pelumenu semana ida dala ida nune'e bele fasilita komunidade sira ne'ebé mak prezisa atu hadi'a sira-nia uma no sasan elekrónika hodi bele asesu filafali.

Entretantu kestaun seluk mak deputadu sira hato'o mós mak preokupasaun sira husi polísia imigrasaun iha Batugade ne'ebé seidauk simu sira-nia saláriu no osan hola hahan laiha. Tanba ne'e deputadu sira husu ba Governu atu tau atensaun ba asuntu ida ne'e.

Alende ne'e, asuntu seluk mak atendentu pesoál saúde sira nian ba suspeitu Covid-19 nian ne'ebé sai preokupasaun tanba pesoál saúde sira la foti uluk ema ida ne'ebé suspeitu ona, maibé ba foti uluk fali nia familia sira uma laran.

Intervensaun husi Governu

Hatán ba preokupasaun deputadu sira nian, Sekretáriu Estadu Komunikaun Sosial, Sr. Mericio Akara hateten preokupasaun hirak ne'ebé deputadu sira hato'o, nia parte sei nota hela hodi konsidera no sei hato'o iha reuniaun Konsellu Ministru nian no mós hato'o ba Ministériu no instituisaun Estadu relevante sira atu toma konsiderasaun hodi bele buka solusaun ba rezolve preokupasaun sira ne'e. Kestaun kona-ba polísia imigrasaun nia saláriu ne'e rezolidu ona.

Iha sesaun *ordem do dia* nian Meza Parlamentu mós halo anúnsiu admisaun hodi baixa ba Komisaun B no Komisaun A Projetu Lei Nu.25/V(3) kona-ba prosede alterasaun dahuluk ba Lei Nú.11/2017 kona-ba Lei Migrasaun no Asiliu. Parlamentu Nasionál halo mós diskusaun no votasaun ba votu saudasaun ho Projetu Rezolusaun Nú.5/2021 kona-ba saudasaun ba selebrasaun aniversáriu Polísia Nasionál Timor-Leste (PNTL) ba dala XXI.

Ho nia rezultadu votasaun, afavór 35, kontra 0 no absteinsaun 16 husi totál deputadu ne'ebé tuir votasaun hamutuk na'in 51.

Alende ne'e, Parlamentu mós halo diskusaun no votasaun iha Jeneralidade ba Proposta Lei Nú.21/V (2ª) kona-ba Alterasaun dahuluk ba Lei Defesa Nasionál.

Iha nia rezultadu votasaun iha jeneralidade aprova ho votu afavór 37, kontra 0 no absteinsaun 13 no proposta refere submete kedas ba iha votasaun iha plenária hodi deside proposta refere submete ba Komisaun B hodi diskute no aprova iha especialidade tuir mandatu konstitusionál nian.

Reuniaun Komisaun A

Komisaun A, Parlamentu Nasionál iha Marsu hala'ó audénsia sira no reuniaun sira hamutuk 6 (neen). Deskrisaun kompletu kona-ba reuniaun sira komisaun A nian nian mak hanesan tuir mai ne'e :

1) 04 Marsu 2021

Komisaun A Parlamentu Nasionál, iha 04 Marsu 2021 halo audénsia pública ho Ministru Justisa, Defensór Públiku, Prokuradór Jerál Repúblika, JSMP no Advogadu Privadu nasionál no internasionál sira iha Timor-Leste.

Objetivu husi audénsia ne'ebé mak Komisaun A halo atu rona no esplora hanoin no komentáriu husi instituisaun relevante sira ne'e kona-ba proposta Lei Nú 25/V kona-ba Rejime Jurídiku ba Asosiasaun Públiku Profisionál no proposta Lei Nú 26/V aprova Estatutu Orden Advogadu iha Timor-Leste.

Iha audénsia ne'e, iha komentáriu no hanoin ne'ebé barak liuliu kona-ba Estatutu Orden Advogadu nian husi advogadu sira no mós JSMP. Entre hanoin no komentáriu sira ne'e, mosu hanoin ne'ebé diferente ka kontráriu entre advogadu sira relasiona ho nesesidade atu kria Orden Advogadu ne'e. Iha hanoin ida hateten katak seidauk to'ó tempu no la nesesáriu atu kria Orden Advogadu tanba númeru advogadu iha Timor-Leste ki'ik tebes no bainhira Orden Advogadu harii nia labele hamriik mesak ka independente tanba laiha kapasidade finanseira atu bele sustenta nia funsionamentu no kapasita advogadu sira.

Enkuantu hanoin ida seluk apresenta katak tempu to'ó ona no nesesáriu duni atu bele kria Orden Advogadu iha Timor-Leste hodi asegura atividade advokasia iha Timor-Leste no bele iha fokus ba kapasitasaun ba advogadu sira, nune'e bele hasa'e qualidade advogadu sira-nian. Relasiona ho kestaun kapasidade finanseira, deputadu no advogadu sira balun, inklui JSMP fó hanoin atu bele inklui kedas iha lei ne'e regalia ruma husi Governu atu bele apoiu serbisu administrasaun sekretariadu Organizaun Advogadu Timor-Leste (OATL) no mós formasaun kontinua ba advogadu sira. Apoiu orsamentu ne'e tranzitoria de'it iha períodu balun to'ó OATL ne'e bele ona iha kapasidade finanseira atu bele funsiona rasik.

Kestaun independénsia OATL nian relasiona ho apoiu orsamentu husi Governu, distinta deputada Carmelita Caetano Moniz no mós JSMP apresenta katak apoiu orsamentu husi Governu sei la iha impaktu ba independénsia OATL nian iha nia atividade advokasia. Ida ne'e tanba organizaun no instituisaun barak tantu públiku no privadu ne'ebé hetan apoiu orsamentu husi Estadu maibé nafatin mantein independénsia hanesan JSMP rasik mós. Independénsia ne'e depende ba organizaun no instituisaun idaidak nia prinsípiu hodi halo tuir nia estatutu no norma internál sira organizaun nian.

Alende ne'e, kestaun importante seluk ne'ebé advogadu sira foti no iha hanoin ne'ebé diferente mak kestaun restrisaun no abertura ba advogadu internasionál sira. Iha advogadu balun propoin atu restrinje liutan ba advogadu internasionál sira atu mai Timor-Leste tanba advogadu nasionál sira seidauk iha kapasidade ne'ebé natoon atu kompete ho advogadu internasionál sira.

Enkuantu advogadu balun hanoin katak la prezisa atu restrinje ba advogadu internasionál sira atu tama mai Timor-Leste tanba ho sira-nia prezensa bele tulun hodi hasa'e kapasidade advogadu timoroan sira no bele kompleta serbisu advokasia tanba advogadu timoroan sira seidauk iha spesialidade ba asuntu spesífiku sira.

JSMP nia parte hato'o katak ezbosu lei foun Orden Advogadu nian kompara ho versaun ida uluk iha ona mundansa ne'ebé di'ak tebes no mundansa sira ne'e barak mak korresponde ho rekomendasaun sira JSMP nian iha paraser ne'ebé hato'o ba Ministériu Justisa antes iha 20191.

Ezbosu lei foun ne'e atribui ona independénsia no kompetensia ne'ebé boot ba OATL, tanba iha esbosu lei ida antes ne'e OATL iha dependénsia boot ba Ministériu Justisa. Nune'e, JSMP espera katak ho prezensa OATL nian bele promove efetividade no kualidade atividade advokasia iha TimorLeste hodi kontribui ba atinje objetivu Estadu hodi asegura asesu justisa ba ema hotu.

Mezmu nune'e, JSMP haree katak iha ezbosu lei Orden Advogadu ne'e seidauk inklui atividade prinsipál iha advokasia nian mak hanesan "Asesoria Jurídika". Atividade ida ne'e mak tuir JSMP nian hanoin no realidade Timor-Leste nian bele sai atividade privativa advogadu sira.

Atividade ida "Konsulta Jurídika" ne'e bele ezerse husi advogadu sira no instituisaun sira seluk ne'ebé trata mós asuntu relevante ba kestaun jurídika, hanesan JSMP rasik. Ida ne'e tanba iha diferensa entre "konsulta jurídika" no "asesoria jurídika", ne'ebé konsulta jurídika ne'e sei la halo akompañamentu ba prosesu tomak kliente nian hahú husi inísiu to'o remata, atividade ne'e fornese de'it informasaun no solusaun ba kazu ne'e.

Enkuantu asesoria jurídika ne'e akompaña prosesu tomak hahú inísiu to'o remata (representa iha tribunál).

Kestaun seluk ne'ebé JSMP hanoin atu bele konsidera iha prátika, liuliu kestaun husu pagamentu ba kliente sira tenke refleta ba realidade Timor-Leste ne'ebé maioria husi populusaun sei moris iha liña pobreza nia okos. Iha kazu balun akontese katak pagamentu ne'ebé husu aas liu fali valór ne'ebé konstitui iha kazu ne'e (valór asaun). Nune'e, JSMP sujere atu montante pagamentu ne'ebé husu tenke menus husi valór materiál ne'ebé konstitui iha kazu ne'e. Nune'e, kliente bele sente hetan benefísiu husi serbisu advokasia ne'ebé advogadu privadu sira fornese.

Entretantu iha enseramentu, Presidente Komisaun A, distintu deputadu Sr. Joaquim dos Santos agradese ba partisipasaun no kontribuisaun Advogadu sira no JSMP iha audénsia ne'e no husu atu bele hatama paraser ba Komisaun A atu bele ajuda diskusaun ba ezbosu lei ne'e iha spesialidade ne'ebé bele iha possibilidade hamosu testu substitutivu ida bainhira apresenta ba Meza Parlamentu Nasionál hodi halo diskusaun no aprovasaun.

2) 17 Marsu 2021

Reuniaun Komisaun A, iha 17 Marsu 2021 mak apresiasaun no aprovasaun ba akta sira no mós relatóriu paraser kona-ba proposta no projetu rezolusaun sira ne'ebé Komisaun finaliza ona nia relatóriu kona-ba audénsia sira ho entidade relevante sira antes.

Akta no relatóriu hirak ne'e mak hanesan, Komisaun halo apresiasaun no aprovasaun ba akta reuniaun anteriór nian, halo apresiasaun no aprovasaun relatóriu paraser kona-ba PPL Nú 25/V/ (3ª) kona-ba Rejime Jurídiku ba Asosiasaun Públiku Profisionál, halo apresiasaun no aprovasaun relatóriu paraser setoriál kona-ba Assembleia Parlamentár ba g7+ no halo apresiasaun no aprovasaun relatóriu paraser setoriál kona-ba proposta Lei Nú 21/V/ (2ª) kona-ba Prosede Alterasaun dahuluk ba Lei Nú 3/ 2010 kona-ba Lei Defesa Nasionál.

Iha reuniaun ba lora ne'e, deputadu sira la konsege aprova ata sira reuniaun anteriór nian inklui PPL Nú 25/V/ (3ª) kona-ba Rejime Jurídiku ba Asosiasaun Públiku Profisionál hodi adia fialfali ba lora tuir mai iha 18 Marsu 2021.

Entretantu rezultadu votasaun relatóriu paraser setoriál kona-ba Assembleia Parlamentár ba g7+ aprovalu ho votu sira afavór 9 kontra 0 no abstain 0.

Enkuantu aprovasaun relatóriu paraser setoriál kona-ba Proposta Lei Nú 21/V/ (2ª) kona-ba Prosede Alterasaun dahuluk ba Lei Nú 3/ 2010 kona-ba Lei Defesa Nasionál aprova ho votu afavór 8 kontra 0 no abstain 0.

3) 18 Marsu 2021

Komisaun A, iha 18 Marsu 2021 halo apresiasaun no aprovasaun ba akta reuniaun anteriór nian no mós halo apresiasaun no aprovasaun relatóriu paraser kona-ba PPL Nú 25/V/ (3ª) kona-ba Rejime Jurídiku ba Asosiasaun Públiku Profisionál.

Rezultadu votasaun ba akta reuniaun anteriór nian, votu afavór 8, kontra 0 no anstein 0. Entretantu rezultadu aprovasaun ba relatóriu paraser kona-ba PPL Nú 25/V/ (3ª) kona-ba Rejime Jurídiku ba Asosiasaun Públiku Profisionál ho nia votu favór 8 kontra 0 no asbetein 0.

4) 24 Marsu 2021

Komisaun A iha 24 Marsu 2021, halo apresiasaun no aprovasaun relatóriu paraser kona-ba levantamentu imunidade deputadu Antonio da Conceição no iha relatóriu ne'e deputadu sira rekomenda hodi hasai imunidade deputadu nian ho parsialmente hodi submete ba prosesu julgamentu sira iha tribunál sobre kazu pekulatu.

Rezultadu votasaun ba paraser Komisaun nian aprova ho votu sira afavór 8 kontra 0 no abstain 1 husi total deputadu presente na'in 9.

Nune'e mós Komisaun A iha momentu hanesan halo mós diskusaun no aprovasaun ba relatóriu paraser kona-ba PPL Nú. 26 /V/ (3ª) kona-ba Lei Orden Advogadu sira nian ho nia rezultadu votasaun ho votu sira afavór 9 kontra 0 no abstain 0 husi total deputadu presente na'in 9.

Enkuantu iha audiénsia Komisaun A nian ho Ministru Justisa ne'ebé representa husi Vise-Ministru Justisa, Sr. José Edmundo Caetano ho Sr. Mário Ximenes nu'udar Sekretáriu Estadu Terra no Propriedade no akompañia husi Diretór Nasionál Terra no Propriedade ko'alia kona-ba

asuntu disputa rai komunidadade afetadu projetu alargamentu Kuartél Jerál PNTL nian iha suku Kaikoli.

Iha parte Ministériu Justisa, apresenta katak progresu indemnizasaun ba kazu ne'e, sira konsidera prosesu falla tanba komunidadade afetadu sira balun la kolabora no sira ne'ebé la kolabora seidak hetan indemnizasaun husi Governu no komunidadade sira ne'e hamutuk uma ka'in 4 (haat). Husi parte Ministériu rasik mós deziste hodi husu kolaborasaun komunidadade nian no sekuandu komunidadade lakohi kolabora entaun obrigatoriamente Governu tenke ezekuta mandatu despezu obrigatoriu ba sira tanba projetu ne'e tuir nia planu tenke implementa ona iha tinan 2021 ne'e no labele tarde.

Deputadu sira kestiona kona-ba valór osan indemnizasaun ne'ebé Estadu atu fó no konsidera valór US\$10/metru 1 kuadradu ne'e ki'ik demais no sei labele rekupera filafali komunidadade afetadu sira-nia moris

Ho nune'e, deputadu sira husu ba Governu atu kria uluk kondisaun antes halo despezu administrativu obrigatoriu ba komunidadade afetadu sira. Deputadu sira mós husu atu indemnizasaun no kompensaun ne'ebé atu fó tenke ho valór ne'ebé rezoável no kondiz ho vida moris agora nian.

5) 25 Marsu 2021

Audénsia Públika entre Komisaun A ho Ministru Administrasaun Estatál no Prezidente Autoridade Munisipál Dili, organizasaun sosiedade sivíl kona-ba PPL Nú. 29/V/ (3ª) ne'ebé prosede nia alterasaun ba Lei Nú. 11/2007, ne'ebé aprova kona-ba Divizaun Administrativa no Teritóriu.

Iha audénsia ne'e Komisaun atu rona de'it Governu nu'udar proponente ba proposta ne'e nia hanoin no apresiasaun sosiedade sivíl nian ba proposta alterasaun ne'e hodi aumenta munisípiu ida mak Ataúru sai nu'udar Munisípiu Espesiál no estabelese postu administrativu foun rua mak hanesan Postu Administrativu Hatulia B no Postu Administrativu Lore I.

Iha apresentasaun ministru nian kona-ba proposta ne'e, nia parte haktuir katak prosesu ne'e liuhusi avaliasaun ekipa tékniku sira halo analiza tuir rekeztu sira ne'ebé estabesidu iha Lei Divizaun Administrativa no Teritóriu nian no haree katak suku rua ne'e pruntu ona sai postu no eleijivél. Enkuantu Ataúru nu'udar munisípiu ne'e mantadu konstitusionál katak hakarak ka lakohi nia tenke sai nu'udar rejiaun espesiál tanba ne'e mak ministériu propoin nia atu sai nu'udar munisípiu ida ketak hodi trata nia hanesan ho munisípiu sira seluk.

Entretantu sosiedade sivíl nia hanoin katak Ataúru presiza kria uluk kondisaun antes estabelese munisípiu ka rejiaun espesiál ida no sira sujere atu halo tranzisaun podér hodi bele sukat no halo planu ho di'ak no forti antes sai munisípiu ka rejiaun espesiál.

Deputadu sira iha sira-nia intervensaun husu Governu atu tau atensaun antes estabelese munisípiu iha Ataúru tanba Ataúru seidak iha postu no nia kompostu husi suku 4 de'it no bele ka lae tuir lei nia bele sai munisípiu ka antes estabelese munisípiu estabelese uluk postu administrativu hodi evita interpretasaun husi postu seluk atu bele ejizé sai munisípiu hanesan Ataúru.

Deputadu sira mós husu ba Governu atu haree mós suku balun ne'ebé merese ona atu sai postu iha Timor laran hodi bele submete mós ba prosesu sai postu inklui estabeselese postu filiál balun ba besik suku sira ne'ebé dok atu asesu administrasaun postu nian liuhusi trata dokumentu sira ne'ebé nesesáriu ba povu sira tenke trata.

6) 30 Marsu 2021

Komisaun A Parlamentu Nasionál, iha 30 Marsu 2021 hala'ó audénsia públika ho Prezidente Tribunál Rekursu (PTR), Ministru Justisa, Defensória Públika, Prokuradór Jerál Republika no mós JSMP hodi fó sira nia apresiasaun inisiál ba projetu alterasaun ba Lei Nú 23/V/3 no proposta alterasaun ba Lei Nú 24/V/3 kona-ba Estatutu Ministériu Públiku nian.

Audénsia ne'e prezide husi Prezidente Komisaun A, distintu deputadu Joaquim dos Santos “Boroluli” ne'ebé akompaña husi membru sira Komisaun A. Iha abertura, nia esplika katak importante husi audénsia ne'e mak atu rona opiniaun entidade relevante sira relasiona ho projetu no proposta alterasaun ba Estatutu Ministériu Públiku nian nu'udar apresiasaun inisiál hodi submete ba Meza PN saida de'it mak entidade relevante sira apresenta antes halo diskusaun no aprovasaun iha jeneralidade no espesialidade.

JSMP apresia inisiativa Komisaun A hodi kontinua envolve instituisaun relavante sira inklui JSMP iha prosesu diskusaun ba esbosu lei impostante sira no konsidera serbisu Komisaun A ne'ebé produtivu tebes hodi tau importánsia ba aselera diskusaun esbosu lei importante sira ne'ebé durante ne'e JSMP halo advokasia ba inklui Estatutu Ministériu Públiku nian.

Iha intervensaun JSMP nian, apresenta mós artigu sira ne'ebé konsidera persiza diskute kle'an mak kona-ba provizaun tuir mai:

- 1) pontu 1) Artigu 4 no kona-ba kompeténsia fiskalizaun nian ne'ebé tuir JSMP kontra Konstituisaun ne'ebé atribui ona kompeténsia ba MP nu'udar na'in ba asaun penál.
- 2) Artigu 16 kona-ba mandatu Prokuradór Jerál, rekezitu sira ba extensaun mandatu tenke iha avaliasaun, alinea d) Artigu 20 kona-ba elejibilidade ba majistratura Ministériu Públiku sira atu kompete ba Konsellu Superiór Majistratura Ministériu Públiku.
- 3) Artigu 22 kona-ba kapasidade eleitóral pasiva ho ativa ne'ebé tuir JSMP tenke define ho artigu ketketak tanba sei ámbigu hela no tenke iha rekejitu sira Majistratura Ministériu Públiku sira atu kompete ba Konsellu Superiór Majistratura Ministériu Públiku *multo bom* ba 1^o klase no exelente ba 2^o klase.
- 4) Alinea 3) Artigu 39 kona-ba kompozisaun inspetór ne'ebé tenke iha valór *multo bom* ba 1^o klase no exelente ba 2^o klase.
- 5) Artigu 95 ne'ebé ko'alia kona-ba protokolu no traju profisionál tuir JSMP nia hanoin katak entre Prokuradór Jerál Repúblika ho Tribunal Supremu Justisa lalele iha tratamentu hanesan tanba tribunal nu'udar órgaun soberania entretantu instituisaun Estadu ida ne'ebé harii atu representa vítima sira ba buka justisa.

Entretantu iha enseramentu, Prezidente Komisaun A, deputadu Sr. Joaquim dos Santos agradese ba partisipasaun JSMP no tribunál iha audénsia ne'e no Komisaun A disponível atu simu paraser

eskrita husi parte sira atu hodi inklui iha relatóriu paraser Komisaun A nian antes submete ba Meza Palamanetu Nasionál hodi diskute no aprova esbosu lei ne'e.

Konkluzau no rekomendasaun

Iha Marsu 2021, reuniaun plenária kontinua funsiona normál iha semana ida dala ida hodi kumpri regra sira ba medida prevensaun surtu covid-19 aplikasaun serka sanitária no konfinamentu obrigatóriu, maibé mós JSMP nota katak reuniaun plenária sira dala barak liu mosu insulta malu de'it hodi la foka ba asuntu sira liga ba interese komún nian.

Komisaun espesializada sira kontinua la'o ho normál inklui partikularmente Komisaun A kontinua hala'o sira-nia atividade ho nomál hodi halo audénsia ho entidade relavante sira kona-ba projetu no proposta lei sira ne'ebé Meza Parlamentu baixa ba Komisaun atu halo apresiasaun no halo mós aprovasaun nia relatóriu paraser sira.

Nune'e, JSMP rekomena:

- atu bele haforsa liutan medida sira prevensaun no kombat Covid19, Governu tenke penaliza sidadaun sira tantu nasionál no internasionál ne'ebé tama-sai ilegál iha liña fronteira sira entre Timor-Leste no Indonézia inklui aplikasaun serka sanitária no konfinamentu domisiliáriu obrigatóriu sira. Aktu la kumpri ka halo tuir dispozisaun legál sira ne'ebé autoridade públiku sira hasai, hanesan lei, dekretu lei no rezolusaun sira ne'ebé relevante ba Covid-19 konsidera nu'udar krime desobidiénsia ne'ebé prevee iha alinea a) pontu 1) Artigu 244 Kódigu Penál ho pena prizaun to'o tinan 3 ka multa no bainhira nia lei kualifika aktu ne'e hanesan desobidiénsia kualifikada, bele hetan pena prizaun entre tinan 1 to'o 4;
- JSMP husu komisaun A atu bele kontinua rona hanoin entidade hotu nian inklui sosiedade sivil iha prosesu lezislasaun sira hodi nune'e bele akumulá hanoin no idea sira hotu hodi hadi'a no dezenvolve lei ne'e ho di'ak antes lori ba iha diskusaun no aprovasaun iha jeneralidade iha plenaria;
- JSMP husu ba membru deputadu sira Parlamentu Nasionál atu ezerse sira-nia knaar nafatin observa ka kumpri regra dixiplinár no sira-nia devér sira ne'ebé regula iha Rejimentu Parlamentu Nasionál no lei relevante sira seluk, nune'e bele prezerva dignidade Parlamentu Nasionál no promove efetividade serbisu Parlamentu Nasionál nian.